

Damask: Za put u Siriju dali 600 eura?

Državni tužilac Dubravko Čampara jučer je od Vijeća kojim je predsjedavala sutkinja Amela Huskić zatražio produženje pritvora za Huseina Erdića iz Bužima i Midhata Traku iz Zenice za još 30 dana. Čampara je naveo da je Tužilaštvo dostavilo Sudu BiH sve dokaze protiv osumnjičenih i ostalih koji su trebali otići u Siriju i priključiti se ISIL-u. Tužilaštvo je, prema njegovim riječima, dostavilo SIPA sve oduzete mobitele i kompjutere od osumnjičenih.

- Osumnjičeni su Nevadu Hušidiću i Merinu Keseroviću dali 600 eura kako bi kupili karte za Siriju. Dali su im i Facebook šifre, imena ljudi kojima se trebaju javiti po dolasku u Tursku, a onda i u Siriju. Sumnjamo i da su uspjeli organizirati odlazak Alije Keserovića, koji je već u Siriji, istakao je Čampara.

S druge strane, odbrane osumnjičenih advokati Adil Lozo i Dževad Kadripašić su se ovom prijedlogu usprotivili, nazivajući ga neosnovanim. Predložili su određivanje mjera zabrane ili kućni pritvor. Lozo je naveo da Tužilaštvo pokušava dokazati postojanje grupe koju su nekad zvali vehabije ili selefije.

- Prema mojim saznanjima, trguje se svjedocima. Sve se pretpostavlja i sve se svodi na svjedoke koji su trebali biti osumnjičeni, mišljenja je Lozo.

Kadripašić je kazao da Tužilaštvo BiH njegovom klijentu daje značaj koji on nema. Trako je u obraćanju Sudu kazao: "Niti sam čuo, niti sam vidio ljude koje spominje Tužilaštvo. Penzioner sam i imam dvoje djece. Čitava Zenica zna moje stanje. Borim se da vratim dug, a ne znam kako sad da plaćam za to što govore."

Do zaključenja ovog izdanja Oslobođenja Sud nije donio odluku. Erdić i Trako su uhapšeni prošlog mjeseca, u nastavku akcije Damask, zbog sumnje da su počinili krivično djelo protuzakonito formiranje i pridruživanje stranim paravojnim ili parapolicijskim formacijama, tačnije da su organizirali odlaske bh. državljana na sirijsko ratište. Osim njih, tada su privedeni Merin Keserović i Nevad Hušidić iz Velike Kladuše, Edin Tabaković iz Sarajeva, Ramiz i Alaudin Ibrahimović, otac i sin iz Maglaja, a koji su nakon saslušanja u Tužilaštvu pušteni na slobodu. Keserović i Hušidić su uhapšeni na Aerodromu u Sarajevu, gdje su planirani da preko Istanbula odu u Siriju i navodno se priključe terorističkoj organizaciji Islamska država, čije su simbole i obilježja imali na svojim profilima na društvenim mrežama.

A. B. Č.

